

東

華

錄

東華錄

雍正四

臣王先謙敬編

臣周澗蕃恭校

雍正二年甲辰春正月丁丑年羹堯奏十二月十三日羅卜藏丹
津送侍郎常壽回營並呈奏章一函筆帖式多爾濟被賊掠去仗
義捐軀請施恩優卹以示鼓勵得旨侍郎常壽乃簡任西甯辦理
青海事務之員伊並不將羅卜藏丹津謀叛情形奏聞一切軍務
悉推諉於年羹堯又擅棄西甯輕往青海爲羅卜藏丹津所獲及
羅卜藏丹津將伊釋放復覩顏生還溺職已甚著將常壽拏解西
安監禁至筆帖式多爾濟被賊擒獲不屈身死甚屬可嘉著交部
照殉節例議敘仍著大將軍年羹堯照例子祭○戊寅諭年羹堯
朕前曾降旨羅卜藏丹津被困時必將常壽送回請罪今果將常

壽送回矣羅卜藏丹津從此又以甘言巧懇阻滯吾兵亦未可定
羅卜藏丹津乃孤負國恩與吾兵對敵之叛賊國法斷不可宥不
得因伊曾封王爵稍存疑慮再與羅卜藏丹津同謀之王貝勒貝
子公等既經背叛其爵卽宜削除伊等或來歸順或被擒獲不必
更論其先曾封爵但論其行事之輕重可寬者從寬應治罪者治
罪辦理奏聞○庚辰以故大學士一等公圖海配享 太廟西廡
○辛巳祈穀於 上帝恭奉 聖祖仁皇帝配享○領侍衛內大
臣公馬爾賽等以伊祖配享具疏謝恩得旨此出自 聖祖皇考
所遺恩旨爾祖茂著功勳爾等其法祖報效各相奮勉○甲申諭
理藩院西海逆賊羅卜藏丹津一事喇嘛等理宜將叛亂之人善
言開導令其和輯不致起事戕害生命是爲維持佛教如其不能
亦應呈明該將軍等各自閉戶安居豈意反助西海背逆之人竟

糾合數千喇嘛手持兵刃公然抗拒官兵及至潰敗猶不降順入廟固守以致追殺覆滅有玷佛教甚矣欽惟 太宗文皇帝時第五輩達賴喇嘛遣使人覲極爲恭順及 世祖章皇帝時將第五輩達賴喇嘛延至京師封爲瓦齊拉達喇達賴喇嘛蒙被殊禮百年以來法教興隆皆我朝之恩賜也前者準噶爾寇犯招地殺戮僧徒拆毀寺廟 聖祖仁皇帝遣發大軍恢復招地俾達賴喇嘛重安法座佛教復興如此隆恩喇嘛並不感激反助悖逆之人兇惡已極於佛門之教尙可謂遵受奉行者乎將朕此旨徧諭各處寺廟喇嘛並住居蒙古扎薩克處之大小喇嘛等知之○丁亥授四川提督岳鍾琪爲奮威將軍○戊子封喀爾喀鎮國公策旺諾爾布爲貝子○辛卯諭兵部副將孫繼宗領兵在布隆吉爾等處同遊擊潘之善大敗青海逆賊孫繼宗著賞給總兵官職銜俟有

陝西總兵官缺出題補○壬辰以牟欽元爲太常寺卿調田文鏡爲河南布政使以高成齡爲山西布政使金啟復爲山西按察使

原任雲南按察使

○以張楷爲江蘇按察使

由浙江糧道遷

○癸巳諭宗人府

皇考以公星尼招搖生事革去公爵繼又念伊先人之故仍復施恩令伊子星海承襲公爵詎知星海又復不才昏庸懶惰身罹國憲皇考尙冀星尼或知懲創改惡習復其公爵以觀後效今星尼不惟不感戴皇考之恩不知改行易轍且各處鑽營無恥莫甚有玷天潢著仍革去公爵拘禁在家將應襲公爵之人查明具奏再伊屬下佐領甚多與公爵不稱可酌畱數佐領給與襲公之人其餘佐領存於公處○諭內閣廣東總督楊琳辦理鹽務以來聞將窮民生理盡行霸占百姓怨憤夫錢糧雖屬緊要當爲百姓存畱微利養生若旣爲錢糧起見又圖自己取利絲毫不與百

姓使窮民失所成羣竊盜其害較缺欠錢糧爲更大矣務須謹慎廉潔從公辦理方屬稱職不可止爲錢糧起見不顧百姓○甲午諭總理王大臣等朕御極以來加恩文武官員各得升階而宗室獨無仕進之路朕欲施恩予以升階思之再三總不可得如用伊等爲大臣等及侍衛猶可供朕使令若用部院或遇屬下人爲大臣難以行走勢必至瞻徇情面若令其鄉試會試與民人一體按檢恐失觀瞻可否補用宗人府官員筆帖式之處爾等傳與宗人府議奏再宗室內有學優才美者作何考選之處亦著議奏○年羹堯奏張家胡土克圖之胡必爾汗原住西甯東北郭隆寺屬下喇嘛甚多素與羅卜藏丹津阿爾布坦溫布和好本年正月郭隆寺眾喇嘛忽聚兵操演臣隨給示禁止而寺內喇嘛傳令東山一帶番人約於是月十一日齊集拒戰臣見反形已露急宜剿滅隨

遣提督岳鍾琪會同前鋒統領蘇丹副都統覺羅伊禮布等統兵進剿尚未至郭隆寺而賊眾已於十二日駐營哈拉直溝迎敵我軍直前奮擊斬殺數千據其三嶺毀其十寨副將宋可進總兵官吳正安黃喜林等各有斬獲隨沿途毀其七寨焚其房屋七十餘所次日抵郭隆寺外山谷間伏賊千餘人皆逃入洞內我兵施放槍礮復聚薪縱火賊俱薰死計前後殺傷賊眾共六千餘名隨毀郭隆寺並查究張家胡土克圖之胡必爾汗消息眾喇嘛已豫先攜往大通河西雜隆地方臣卽將達克瑪胡土克圖正法此次效力弁兵及陣亡受傷者俟查明咨部得旨效力官兵俟事竣議敘其勞績尤著之官兵俱著加銜二等○庚子建 孔子廟於歸化城左右兩翼各設滿學教官一○辛丑封喀爾喀一等台吉滾卜扎布爲輔國公○壬寅直隸巡撫李維鈞奏請揀發人員以收實

效諭直隸咫尺京師必無懸缺久待之慮朕於遠省每揀發人員
不過暫時權宜止行一二次並非常例應將一省屬員內量材器
使斟酌調補隨時摺奏以聞○癸卯廣東巡撫年希堯奏盤查藩
庫用巡撫封條封貯但新收錢糧多寡未悉請另設一庫委道官
一員兼同藩司察視收支得旨朝廷設官各有職掌巡撫乃朕任
用之人藩司亦朕所簡用者理應協恭辦理況撫藩同在一城儻
有虧空何難覺察年希堯欲令道員監察藩庫向來道員倉庫藩
司有盤查之責今反欲自下察上殊屬倒置原本發回嚴加飭行
○以壽州定遠等州縣歉收命發前截漕米四萬石平糶○部覆
黃炳奏山東散賑銀米著落各官賠補 上不允命給帑

二月丙午初

聖祖仁皇帝

御製上諭十六條頒示八旗及直

省兵民人等自綱常名教之際以至耕桑作息之間本末精粗公

私鉅細各舉要領垂訓萬世 上以各條遵行日久慮民或怠宜
申告誠以示提撕迺復尋繹其義推衍其文共得萬言名曰 聖
諭廣訓並製序文刊刻成編頒行天下○諭八旗文武官員人等
我國家念爾等祖父皆係從龍舊臣著有勳績故加恩後裔量才
授官冀收心膂驅策之效爾等自當恪守官箴勤勞王事建股肱
之盛烈垂清白之家聲庶幾上以仰報君恩下以顯揚世美乃每
見旗員居官不能悉體朝廷期望之意賢否雜出志行不齊由筮
仕之初輒謂旗人與漢人不同漢人無累可以硜硜自守旗人則
本旗官屬需索多端親族往來責望甚眾萬一任滿又不免有當
差之累此念一起百弊叢生不以忠君體國爲心不以曠職殃民
爲懼潛通賄賂恣意苞苴惟期囊橐之充盡喪廉隅之守殊不思
國家察吏廉者獎貪者懲滿與漢無二法也爾等果能潔己奉公

始終一節休聲丕著惠政日聞朕自當從優擢用以示獎勵凡所過慮皆可不必如其不然則法網難寬縱家擁厚貲安能坐享乎至於爾等家世武功業在騎射近多慕爲文職漸致武備廢弛而由文途進身者又止倣倖成名不能苦心向學玩日愒時迄無所就平居積習尤以奢侈相尙居室器用衣服飲饌無不備極紛華爭誇靡麗甚且沈湎梨園遨遊博肆不念從前積累之維艱不顧向後日用之難繼任意糜費取快目前彼此效尤其害莫甚朕特加諄諭自此以後出仕者各宜精白乃心靖共爾位人人以廉能自矢不得藉旗人多累之說以遂其罔上行私之術八旗子弟各習其業文則潛心制義博覽詩書務求用世之實學武則嫻習弓馬講究韜略預儲闡外之良材且各崇儉戒奢安分循禮父誠其子兄誠其弟與其恣情縱意博一日之豪華何如量入爲出謀百

年之生計與其蕩檢踰閑作無藉之匪類何如謹身寡過勉有用之事功以報朝廷以縣世澤以敦風俗以保身家顧不美歟大雅之詩曰凡周之士不顯亦世蓋欲疏附後先之子孫亦世世修德與周匹休也爾等八旗皆佐命後昆深願克紹前修榮名悠遠國家亦重有賴焉其各欽承毋忽○諭各省關差鹽差等官從來關樞鹽稅之設所以通商裕國或用欽差管轄或令督撫兼理無非因地制宜利商便民之至也朕前於關鹽兩差各下諭旨誥誡諄切但旗員向來相沿成習陽奉陰違任意侈靡不知撙節額外加派苦累商民差滿之日惟恐回京有當差效力之事每以缺額懇求寬限希圖掩飾是以不憚丁寧再加申飭大抵關差之弊皆惟知目前小利恣意侵漁聽信家丁縱容胥吏開關分別遲早肆無厭之誅求報單任意重輕爲納課之多寡飽谿壑者則任其漏稅

代爲朦朧不遂願者則倒篋傾箱不遺纖細致商賈畏懼裹足不前行旅徬徨越關迂道則困商實所以自困也鹽差之弊尤合重徵飛渡重照貴賣夾帶弊之在商者猶小加派陋規弊之在官者更多若不徹底激清勢必令商人失業國帑常虧夫以一引之課漸添至數倍有餘官無論大小職無論文武皆視爲利藪照引分肥商家安得不重困賠累日深則配引日少配引日少則官鹽不得不貴而私鹽得以橫行故逐年之課難以奏銷連歲之引盡皆壅滯非加派之所致與故關差在嚴禁苛求使舟車絡繹貨物流通則稅自足額鹽差惟在力除加派使商困少蘇盡復舊業則課自盈餘至於督撫係封疆大吏更當仰體朝廷歸併之意乃罔恤窮商獨專厚利硬派州縣計口徵錢夫樵關部屬尙有顧忌恐督撫持其短長今歸督撫則何所瞻顧巡鹽御史地方官或不奉約

東今歸督撫則孰敢抗違況欽差猶每年更換而督撫兼理則無限期若不實心奉行使風清弊絕則大負歸併之本意矣至將耗羨充課固屬急公但恐以耗羨歸正額而額之外復加耗羨商民重輸疊出何以堪此朕深悉關鹽擾累之害垂念商民營逐之苦特諭爾等經理榷稅者務期奉公守法遴委得人知商旅之艱辛絕箕歛之弊實通商卽所以理財足民卽所以裕國如敢自利自便罔上行私責有攸歸其悉遵朕旨○戊申以李衛爲雲南政使仍兼鹽務

由驛鹽道遷

○廣西提督韓良輔奏謝賞賚恩得旨賞罰

之柄雖操於朕若偏徇以愛惡之私則對天下後世不能無慚惟本至公而施之各當然後人心悅服是賞罰雖云在朕而實在海內臣民之自取也○己酉諭諸王大臣九卿等欽惟 孝莊文皇后躬備聖德 天錫純禧誕育 世祖章皇帝瑞應昌期君臨萬

國逮我 聖祖仁皇帝繼 聖嗣統久道化成立萬世無疆之業
皆我 孝莊文皇后福德兼隆之所啟佑也康熙二十六年十二
月 慈馭升遐先期再三面諭我 聖祖仁皇帝曰我身後之事
特以屬汝 太宗文皇帝梓宮安奉已久卑不動尊此時未便合
葬若另起瑩域勞民動眾究非合葬之義我心戀汝父子不忍遠
離止於遵化州 陵瑩近處安厝我心無憾矣 聖祖仁皇帝涕
泣受 命爰 諭諸王大臣集議僉同於康熙二十七年四月安
奉 梓宮於 孝陵之南爲 暫安奉殿迄今三十餘年矣朕惟
禮經云合葬非古也先儒又云神靈有知無所不通是知合與不
合惟義所在今 昭陵安奉日久若於左近另起 山陵究非合
葬之義且自 孝莊文皇后安奉以來我 聖祖仁皇帝厯數縣
長海宇又安子孫蕃衍想 孝莊文皇后在天之靈極爲安妥

遺命諄諄

聖祖仁皇帝遵奉三十餘年今朕身任付託之重

山陵典禮斟酌盡善永垂萬世事莫大焉著諸王大臣九卿等會同確議具奏○庚戌諭刑部部內彙奏本內有罪應割筋者定例固然但割後卽成廢人理宜審慎今部奏入彙題冊中恐致疏忽嗣後滿洲人等有此罪之案另行具奏○壬子年薨薨奏青海貝勒羅卜藏察罕貝子濟克濟扎布台吉滾布色卜騰納漢伊席羅卜藏察罕之母率領伊等妻子及貝勒策凌敦多卜之姊投至西甯隨酌給茶葉大麥等項仍令往口外駐紮訖臣思羅卜藏丹津欲威脅懦弱以益兵力眾人尙在游移若不乘機派兵前往則來投之人勢難保全臣令提督岳鍾琪總兵官吳正安黃喜林侍衛達爾副將王高宋可進紀成斌等領兵六千名分二路進剿前鋒統領蘇丹畱於西甯軍營辦事報聞○癸丑諭直隸各省督撫等

朕惟撫養元元之道足用爲先朕自臨御以來無刻不廛念民依
重農務本但我國家休養生息數十年來戶口日繁而田地止有
此數非率天下農民竭力耕種兼收倍穫欲家室盈甯必不可得
周官所載巡稼之官保介田畷皆爲課農設也今課農雖無專官
然自督撫以下孰不兼此任各督撫其率有司悉心相勸並不時
諮訪疾苦有絲毫妨於農業者必爲除去仍於每鄉中擇一二老
農之勤勞作苦者優其獎賞以示鼓勵如此則農民知勸而惰者
可化爲勤矣再舍旁田畔及荒山曠野度量土宜種植樹木桑柘
可以飼蠶棗栗可以佐食柏桐可以資用卽榛櫟雜木亦足以供
炊爨其令有司督率指畫課令種植仍嚴禁非時之斧斤牛羊之
踐踏奸徒之盜竊亦爲民利不小至孳養牲畜如北方之羊南方
之彘牧養如法乳字以時於生計誠有裨益總之小民至愚經營

衣食非不迫切而於目前自然之利反多忽略所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官各體朕惓惓愛民之意實心奉行儻視爲具文苟且塗飾或反以擾民則尤爲不可也○丙辰禮部等衙門奏 聖祖仁皇帝以明太祖宗祀淪絕訪求支派一人授之官爵恪奉烝嘗我 皇上繼志存恤特申前諭臣等謹按明太祖之子封藩者十二人迄今三百餘年子姓雖繁無從考證查得鑲白旗朱文元係明太祖第十三子代簡王之後明崇禎時簡王後裔代王爲洪承疇監軍於松山我 太宗文皇帝時代王與伊姪文元同被俘獲遂歸我朝曾蒙 聖祖仁皇帝召見親詢宗系今原任內閣侍讀學士朱海錫之子眾關保等俱文元之孫也文元於順治年間曾奏明往大同取其宗族來京今見任直隸

正定府知府朱之璉一支是也請於此一支內查取譜牒吏部揀選引見擇用一人隨飭禮部差官同伊祭告明太祖陵及昌平十三陵以承祀事仍令回京居住嗣後每年春秋二季令其呈明前往從之○戊午諭總理王大臣等青海之事不日告竣而策妄阿喇布坦亦屬恭順其撤回各路之兵及固守地方之事應豫行定議額駙策凌貝勒博貝俱在阿爾泰駐紮年久地方情形皆所悉知見皆在京可詳詢阿爾泰一路兵丁如何撤回及駐防兵丁應於何處安設之處確議具奏尋議撤阿爾泰及烏蘭古木兵於茂岱察罕叟爾扎克拜達里克兩處從之○諭各省督撫凡百姓完納錢糧當令該戶親身投納不許里長甲首巧立名目希圖侵蝕不肖生員監生本身田產無多輒恃衣衿包攬同姓錢糧自稱儒戶宦戶每當地丁漕米徵收之時遲延拖欠有誤國課通都大邑

固多而山僻小縣尤甚該督撫著卽嚴查曉諭革除儒戶宦戶名目如再有抗頑生監卽行重處毋得姑貸儻有瞻顧不卽革除此弊者或科道參劾或被旁人告發治以重罪○解李馥任以黃叔

琳爲浙江巡撫

由吏部左侍郎遷

○年羹堯奏據岳鍾琪報稱二月初八

日領兵出口聞巴爾珠爾阿喇布坦在烏蘭博爾克地方卽分兵三路進剿及至其地賊人已經逃遁遂令總兵官吳正安率兵由北路總兵官黃喜林副將宋可進率兵由中路岳鍾琪侍衛達爾率兵由南路往追賊人副將王嵩紀成斌等各率兵接山岳鍾琪追至伊克哈爾吉地方阿爾布坦溫布逃入哈爾吉山中我兵進山遂擒獲阿爾布坦溫布黃喜林擒獲巴珠爾阿喇布坦並其叔伊克喇布坦因追剿賊首羅卜藏丹津不可遲延卽攜擒獲之阿喇布坦等三賊進剿並收撫逃散部落報聞○己未予陣亡原任

湖廣總督額倫特祭葬諡忠勇○辛酉諭禮部帝王臨雍大典所以尊師重道爲教化之本朕覽史冊所載多稱幸學而近日奏章儀注相沿未改此臣下尊君之詞朕心有所未安今釋菜伊邇朕將親詣行禮嗣後一應奏章記註將幸字改爲詣字以伸崇敬○阿錫鼐緣事革職轉薩爾納爲工部左侍郎以綽爾岱爲工部右侍郎由內閣學士遷○壬戌調噶爾圖爲盛京禮部侍郎以馬喇爲刑部右侍郎由副都統遷○癸亥 上親耕藉田三推畢又加一推嗣是以

爲常○甲子諭各省督撫朕惟四民以士爲首農次之工商其下也漢有孝弟力田之科而市井子孫不得仕宦重農抑末之意庶爲近古今士子讀書砥行學成用世國家榮之以爵祿而農民勤勞作苦手胼足胝以供租賦養父母育妻子其敦龐醇樸之行雖寵榮非其所慕而獎賞要當有加其令州縣有司擇老農之勤勞

儉樸身無過舉者歲舉一人給以八品頂帶榮身以示鼓勵○年
羹堯奏羅卜藏丹津背叛阿岡部落賊番每探報內地信息臣令
涼莊道蔣洞等率兵四路進剿擒斬人口牲畜無算即將賊首阿
岡羹蘇正法得旨蔣洞著加按察使銜○丙寅雲貴總督高其倬
疏報中甸地方原係麗江所屬後爲青海占去領逆賊羅卜藏丹
津僞札臣遵旨令提督郝玉麟帶兵駐紮中甸其番夷人等隨卽
投繳僞札歸誠納土見在安撫清理疆界得旨郝玉麟遵旨率兵
至中甸揚威駐紮宣布德意中甸番夷頭目歡忭感激率眾三千
五百戶男婦一萬七千五百名喇嘛一千十四人投誠納土高其
倬復遣官安撫殊屬可嘉俟青海事竣之日議敘具奏○年羹堯
奏據岳鍾琪報稱二月十四日領兵至席爾哈羅色地方知吹拉
克諾木齊見在天城察罕哈達居住因卽派兵前往擒獲男婦牲

畜甚多吹拉克諾木齊於十四日帶三百餘人乘夜遁往噶斯地方其屬下都喇爾寨桑及扎錫敦多布之母帶領屬下人口馬匹逃遁被台吉益蘇克汪扎爾等擒獲投獻卽賞給伊等段匹銀兩令帶領蒙古兵五百名往噶斯一路追擒吹拉克諾木齊並令守備劉廷彥等帶兵同往再訪得羅卜藏丹津仍在原處居住大兵務於十九日至伊所住地方進剿報聞○丁卯轉史貽直爲吏部左侍郎以沈近思爲吏部右侍郎由太僕寺卿遷○年羹堯奏據涼莊道蔣洞報稱石門寺喇嘛蘇蘇山丹等所屬羅卜藏馬賈等部落從前佯稱歸順潛與謝爾蘇厄爾二部落逃散人等倚石門寺爲巢穴肆行劫掠等語臣隨令蔣洞率領綠旗土司民兵分爲五路進發至石門寺奮勇齊擊殺死喇嘛番賊六百餘人按寺得盜甲五十餘副刀槍撒袋等物甚多因卽將寺毀焚收兵而還報聞○

庚午 上詣

黑龍潭祈雨○辛未康親王崇安等遵旨議奏

聖祖仁皇帝遵奉

孝莊文皇后遺旨奉安

暫安奉殿至今三

十餘年

聖祖仁皇帝福壽康甯四海生民樂育誠希有之吉兆

允宜定爲陵寢得旨是著卽擇日興工○壬申諭刑部今屆仲春雨澤愆期時有大風朕心深用兢惕念自臨御以來惟恐政事或有缺失時時省察不敢少有忽略且令諸臣直言陳奏而諸臣所奏徒事頌揚毫無裨益朕之虛心至意可以質諸 天地實堪自信無少愧處熟思刑名爲國家之要務上關 天和下繫民命若刑獄未能清理卽爲天時亢旱之由是以朕於讞獄再三詳愼卽懲治之人雖置之於法朕於其中從寬從輕之處惟 天地知之至於兇頑之徒情罪重大眾人有知者亦有不能盡知者俱於法外從寬不可勝數並未冤抑一人此亦可以自信者但爾部所辦

案件雖如朕親理然其中終有微間夫用法不得不嚴所謂火烈而民畏之爾等執法之官固宜外示嚴明而中心須存仁恕凡案件到部數日可結者不得固執定限卽當速行審結以免拖累牽連則輕罪之人不至久羈囹圄且案件早完一日則無辜者得早脫一日之苦若因限期未滿任意耽延雖所告得伸者亦必致其含怨卽訊鞫罪人亦不可輕用重刑若云非夾訊不能定案此尤爾部之大謬錄囚之際當如懲治家人子弟嚴切之下務存矜憫之心但求平允不可過當所謂如得其情則哀矜而勿喜也朕在藩邸時奉 聖祖諭旨發審事件初見用刑徧體驚顛不覺淚下至數見之後遂覺少異於前爾等刑官訊獄動刑習爲常事若少有未當所關甚鉅卽大負朕任用之意且爾等亦當自念其子孫豈可疏忽致有後悔乎蓋刑部非他曹可比尤不可以愚昧意想

不到以致錯誤爲辭嗣後諸事當同寅協恭速爲辦理毋得恃才偏執毋得瞻徇推諉務宜仰體朕心以恤民命也○癸酉年羹堯奏楚克賴納木扎爾率伊子策凌敦多卜及屬下一千餘戶來投賞給茶葉大麥等物仍令往伊克烏闌和邵等處居住報聞

三月乙亥朔 上詣太學釋奠 先師孔子御彝倫堂命講大學尚書廣太學鄉試中額○丁丑雨 上賦詩誌喜○河南巡撫石文焯奏請將捐穀耗羨銀兩存庫充公得旨耗羨存庫不過暫寄以備地方公用斷不可歸入錢糧之內凡此等羨餘概不得牽混正項國家經費自有常額若將此入正項爾等羨餘必仍另取不特名實相違且恐移東就西反致滋弊○山東巡撫黃炳奏父子兄弟同登仕籍繕摺謝恩得旨爾一門榮寵固幸遭逢然必能互相砥礪感恩圖報方期福澤綿遠若倚勢家庭顯耀任情縱恣朋

比黨援轉相請託順之者屈意容隱逆之者多方排擠甚至欺君虐民有所不顧如此則目前富貴非爲福基翻爲禍媒歷觀古今人事履盛滿之時不惟不敢稱慶且更加謙謹所以世代子孫長保安全也爾可體此意傳親族之在仕籍者俱令知之○戊寅詣學禮成 上御太和殿羣臣朝賀是日召衍聖公孔傳鐸之子孔繼溥等入見賞賚有差○大學士等奏 皇上至誠至敬感協天心甘雨應時隨禱立應合辭稱賀得旨誠敬二字朕之所勉朕能先天下之憂而憂諸卿必後天下之樂而樂也期卿等共勉之○轉金世揚爲工部左侍郎以李鳳翥爲工部右侍郎署工部侍郎○封科爾沁協理旗務台吉烏爾呼滿爾和托輝特台吉沙克扎俱爲輔國公○庚辰 上恭謁 陵寢啟鑾○移江西湖口關於九江分設口岸於大姑塘○癸未詔大計軍政應奪職者毋俟部覆卽

令解任○年羹堯奏二月初八日遣岳鍾琪率大軍往剿羅卜藏

丹津由布爾哈屯直抵賊巢額毋訥布隆吉地方分兵一千往北路柴旦木豫截賊眾逃往噶斯要路岳鍾琪率兵從南路尾追二十日探知賊眾逃往烏蘭穆和兒地方及至其地賊眾復逃往柴旦木地方又分兵一千追逐大軍隨後沿途進擊擒獲羅卜藏丹津之母阿爾太喀屯及其妹夫克勒克濟農藏巴吉查等並男女牛羊無數二十二日至柴旦木羅卜藏丹津帶二百餘人逃竄潛匿隨分兵至烏蘭白克地方擒獲吹拉克諾木齊扎錫敦多卜並男女駝馬無算其助亂之八台吉等亦並擒獲見在羅卜藏丹津之母及賊黨阿爾布坦溫布等八人及歸降之盆蘇克汪扎爾等四人俱解送軍前青海部落悉平報聞○甲申 上謁 暫安奉殿 孝陵 孝東陵 景陵○諭總理王大臣等青海逆賊羅卜

藏丹津之事大將軍年羹堯奮威將軍岳鍾琪以及兵丁皆奮勇
殺賊於十五日內卽能將逆賊剿滅平定殊爲可嘉年羹堯著授
爲一等公再賞一精奇尼哈番岳鍾琪著授爲三等公凡效力官
兵俱加優恩策勳外著戶部動用錢糧二十萬兩送至大將軍年
羹堯處分別官兵效力等次賞給以示格外加恩之意○封大將
軍年羹堯之父年遐齡爲一等公加太傅銜賜段九十四○乙酉
清明節 上親詣 景陵著黃布護履躬自負土膝行至 寶頂
跪添土畢匍匐退行又詣 隆恩殿行大祭禮祭畢入至 寶城
前伏地哀慟諸王大臣敦請再四出 隆恩門猶瞻望移時乃回
行宮 上回鑾○丁亥 上還京師○庚寅封裕親王保泰子廣
華爲輔國公○壬辰敕諭準噶爾台吉策妄阿喇布坦爾前者無
故侵擾我哈密疆界罪在不赦 皇考聖意止令於邊地防守雖

各路發兵原無剿滅準噶爾之意也其後澤卜尊丹巴胡土克圖
爲爾奏懇 皇考欲施恩寬宥所以遣使楚陽託音等諭爾前年
爾所遣垂納木喀布厓等至澤卜尊丹巴胡土克圖處轉至總督
年羹堯軍前送至京師朕定爾平生功罪開示大義面諭遣回今
爾深省前非歸誠請罪遣使根頓同楚陽託音前來奏辭恭順得
遂 皇考初心朕意嘉悅爾奏稱惟祈休養生靈闡揚正教爲第
一要務等語爾台吉不過準噶爾一部落之主尙欲休養生靈闡
揚正教何況朕爲四海臣民之主普天之下皆朕土率土之濱皆
朕臣乎用是特遣御前總管京城喇嘛班第副扎薩克大喇嘛達
爾漢楚陽托音內閣學士眾佛保副都統扎錫喇嘛錫拉卜格春
等宣諭若台吉果欲輯甯爾國尙其誠一乃心與朕所遣大臣等
申定疆圻諸事循理妥議歸於和順朕必施恩軫念永加眷顧仍

前通市使命往來爾台吉誠能以鮮終爲戒其必惟和惟順無貳
無疑披瀝悃忱以期永好不特克協於朕休養生靈至意爾台吉
遊牧地方亦永永無虞安居樂業矣特賜諭示並賜各色段二十
匹爾其祇領○江南提督高其位奏松江之泖湖澱湖澄湖港汊
叢雜奸宄易滋目今太湖遵旨稽查防範泖澱諸湖亦宜豫籌防
禦計松江所屬一百十三處俱應釘椿立柵編民船嚴啟閉以杜
奸宄出沒之路得旨此事廷議不准行夫地方文武大吏酌量彼
處情形相機而爲又在爾等權宜措置也查果無礙於商民之處
毋因廷議不准遂爾中止地方諸務總以便民爲主誠實心任事
自必情理俱洽○年羹堯奏副將軍阿喇納報稱阿拉布坦蘇巴
泰等截路搶奪宜行殲除臣令總兵官孫繼宗喀爾喀扎薩克通
摩克等率兵進剿至哈拉腦兒知阿拉布坦蘇巴泰等逃往阿祿

巴爾虎卽進兵追至推墨爾地方賊人拒敵被官兵擊敗盡棄牛羊止率妻子逃去報聞○癸巳命江蘇各屬設粥廠資賑○甲午諭刑部刑獄關繫重大必須虛公詳慎盡得實情不可疏忽遺漏以致民有冤抑夫君臣之義本同一體朕視臣下如手足也爾等遇事有可疑不能決者不妨面奏俟朕斟酌至當然後施行若既不面奏又以私心揣度巧爲迎合及刑罰不中則退有後言將所謂股肱大臣之任而存心卑污如此豈不可恥或朕有未當之處亦不妨直陳所見人非聖人孰能無過君子之過如日月之食過而能改善莫大焉朕之不吝改過諒爾諸臣素所共知凡有功者加之以賞有罪者加之以刑此乃帝王御世之大權朕但知因事順應並不先有成見爾等皆宜體朕欽恤之意不可自恃己見亦不可彼此推諉和衷協恭平心靜氣毋得有意迎合務使用法如

衡之平如鑑之明庶幾民不輕犯國無冤獄以共成咸中有慶之

治○以覺羅塞德爲左副都御史

原任員外郎

○丙申以青海平定遣

官告祭

天 地

宗廟

社稷

奉先殿

○丁酉直隸巡撫李

維鈞奏見行地方事宜各款虧空地丁銀兩均攤十分之四以便

逐漸補完一減火耗每兩二三以紓民力一起解兵餉知府例

有規禮今悉裁革令州縣自行解司一各官衙署例有里下鋪墊

陋規今已革除一清查地畝無致隱佔一行保甲以杜奸匪一查

飭武弁除募兵虛兵之弊一親檢三營甲幟勤加操演一修整煙

臺添建營房增設馬步兵五名以嚴防汛一編飭村莊築牆掘濠

兼選壯丁習練以防盜賊一驛路兩旁栽種柳樹以恤行旅得旨

天下督撫皆當如此畱心擴而充之何虞吏治不肅民生不遂耶

村莊溝壑實係有益之事但須豫爲陳說利害使愚民灼知有益

踴躍樂從秋成之後方可行之斷不宜急遽強迫也民壯頭目殊難其人須擇平素爲眾所推服者方可委之董率尤須飭地方官不時稽查其行止勿致生事至種樹卽古人列樹表道之意朕見刊諭一道尙未頒發爾奏恰合隨卽通行直隸各省矣○賞各旗窮乏兵丁銀兩置備盔甲兵器○戊戌以陳世倌爲內閣學士翰林院侍讀學士○己亥禁八旗官員兵丁無得於園館游蕩縱飲○革

除各省門差牙帖○庚子予故致仕禮部尙書凱音布祭葬○壬

寅江西巡撫裴律度奏湖口關稅贏餘應悉解部得旨今歲贏餘是爾等情釐所致但數覺過多儻額外剝削商民則斷然不可開稅多少繫於年歲之豐歉難可豫定或遇不及之年不可勉強必求足數不然是又增加稅額矣當嚴飭胥吏毋致苦累商民○晉封喀爾喀鎮國公顏楚卜多爾濟爲貝子○癸卯年羹堯奏據侍

衛達鼐報稱三月初三日與副將紀成斌等搜尋羅卜藏丹津屬人探得夾木燦堪布喇嘛在布代山後藏匿恐由西藏一路逃遁遣人往調台吉濟木巴等派蒙古兵往西藏邀截卽率兵前進至梭羅木地方夾木燦堪布等拒戰敗遁我兵隨後勦殺濟木巴台吉等鈔路迎賊將夾木燦堪布垂扎木素二人擒斬報聞○是月免廣東海康遂溪二縣雍正元年水災額賦

夏四月乙巳以青海平定道官告祭 暫安奉殿 孝陵 孝東

陵 景陵○敘平青海功授參贊蘇丹總兵官宋可進爲三等阿

達哈哈番總兵官黃喜林爲二等阿達哈哈番按察司王景灝總

兵官周瑛副將王嵩紀成斌爲拜他喇布勒哈番提督郝玉麟總

兵官吳正安爲拖沙喇哈番以侍衛達鼐爲副都統授拜他喇布

勒哈番其餘有力將士升賞有差○丙午怡親王允祥等議覆副

河道總督嵇曾筠奏河工調遣不敷請設標下河兵應不准行得旨嵇曾筠已授副總河駐紮南河兼管運河於河南黃河相去甚遠猝有緊要工程實難相顧若無標下官兵難供驅使見在總河標下河兵十營爲數甚多或令齊蘇勒酌撥分給務期永遠可行爾等詳議具奏尋議河南黃河險要之處莫如懷慶府屬之武陟縣應令副總河駐紮彼處督率防護就近撥河南撫標守備一員千總一員把總二員馬步兵一百名按季更替聽副總河差遣至河標營兵應令總河齊蘇勒酌撥分給從之○刑部等衙門奏焦宏勳侵隱莊親王財產議罪一案御史楊纘緒田嘉穀俱不畫題得旨楊纘緒田嘉穀俱有言職風聞事件尙許奏聞此案三法司堂官俱已畫題若議罪之處與伊等意見不合卽應另行啟奏伊等旣不畫題又不另奏非欲沽名卽係徇私爾等傳諭楊纘緒田

嘉穀令其明白回奏嗣後凡會稟有不畫題者該部卽行聲明具

奏○丁未以孔毓珣爲兩廣總督李紱爲廣西巡撫楊汝穀爲兵

部右侍郎

由左副都御史遷

○己酉予雲貴總督高其倬拜他喇布勒哈

番世職以其調兵出口諸事盡心也○庚戌諭諸王大臣等自戊

子年來朕之無知兄弟數人種種妄行以致 皇考暮年憤懣未

嘗貽 皇考一日之安也是以肌體消瘦血氣衰耗伊等非惟不

自引咎毫無愛戀之心且固結黨援希圖僥倖由來久矣朕時時

殫竭心力寬慰 皇考保全伊等不但伊等知之諒亦眾所共知

也朕卽位後惟篤兄弟之誼曲予包容指示教誨冀其改過以期

終始成全此朕向在 皇考時卽志願如此豈今紹登大寶而於

兄弟間有指瑕求疵之理乎允禩素行陰險狡詐 皇考深知曾

于朕兄弟前屢降 諭旨不可悉數今姑舉其一與眾知之康熙

五十三年 皇考自熱河回鑾駐蹕遙亭允禩遣人以將斃二鷹
上進 皇考閱見甚怒隨有 硃批諭旨以示朕及諸皇子比時
捧覽之下俱無奏言朕獨繕摺具奏所批 諭旨誠親王收貯見
今繳上諒此 嚴旨允禩未必得知卽允禩亦斷不以告也 皇
考所遺諭旨諸王大臣一經捧閱卽知之矣朕豈有意陵虐苛責
之哉自朕卽位允禩優封親王任以總理事務理應痛改前非感
朕包容委任之意輸其誠悃以輔朕躬乃不以事君事兄爲重猶
以同輩諸弟允禔允禵爲伊出力之故懷挾私心至今未已也諸
凡事務不實心辦理有意墮廢且每遇奏事並不身到亦不親加
檢點苟且草率付之他人豈非欲故激朕怒以治伊罪加朕以不
令之名乎允禩較諸弟頗有辦事之材朕甚愛惜之非允禩允禵
等可比是以朕屢加教誨令其回心改過殫厥至誠佐理政治爲

國家得力之人不但成朕友于之誼亦以全 皇考慈愛之衷伊
果盡心國事卽盡心於 太祖 太宗 世祖 聖祖也豈惟身
受隆恩且傳之子孫亦永永勿替若仍不知悛改肆行悖亂干犯
法紀朕雖欲包容寬宥而國憲具在亦無可如何當與諸大臣共
正其罪矣昔 皇考年十五執巴圖魯公鰲拜往事可鑒朕若果
欲將允禩治罪豈有於眾前三復教誨之理實望其回心耳爾諸
王大臣宜時加規勸務令改悔允禩果能回心改過明於君臣大
義感激朕恩表裏如一爾等卽據實陳奏若怙過不悛亦斷不可
隱諱允禩 聖祖仁皇帝之子朕之弟也安可目覩其日卽於凶
惡乎伊之善惡若不據實奏明稍有隱匿非惟負朕更有何顏瞻
拜 景陵朕向日並無希望大位之心亦不效伊等營謀有所糾
合之人以市私恩小義之名他人容或不知深知朕者無過允禩

也 皇考以大位付朕朕念 皇考四十五年顧復深恩勉承大
統仰荷貽謀之重大夙夜祇懼不遑寢食天下幾務無分巨細務
期綜理詳明朕非以此博取名特以欽承 烈祖開荆洪基仰
體 皇考付託至意爲 社稷之重勤勞罔懈耳古云爲君難若
止圖一身逸樂亦復何難惟欲繼美 皇考之治則憂勤惕厲莫
難於爲君矣朕既受 皇考所付重任則朕之一身上關 宗廟
社稷不得不爲防範且允禩於 皇考時毫不遜順恣意妄行
匪朝伊夕至今猶然不止朕可不念 祖宗肇造鴻圖永貽子孫
之安乎茲大臣等參奏允禩一摺曾與誠親王恆親王溥親王閱
看王等皆云猶有 皇考大內所降諭旨伊等不知之處甚多隨
以 皇考從前所降諭旨另行繕摺具奏請將此摺傳示諸王大
臣乃允禩再三懇求奏請免其宣示以全顏面等語果能從此改

悔著將另行繕摺之處暫停宣示著宗人府內閣一併鈐印封固內閣敬謹存貯○諭刑部朕惟明刑所以弼教君德在於好生從來帝王於用刑之際法雖一定而心本寬仁是以虞廷以欽恤垂訓周書以慎罰爲辭誠以民命至重少涉疑案甯過乎仁不過乎義也朕自臨御以來一切奏章無不畱心細覽於刑獄一事尤加詳慎誠恐法司未能平允情罪未能悉當故凡京城及直省題奏獄獄少有可矜者無不法外施仁量加末減獨念朝審重囚其情實者刑科必三覆奏聞勾除者方行處決而外省情實重囚惟於秋審後法司具題卽咨行該省無覆奏之例朕思中外一體豈在京諸囚宜加詳慎在外省者獨可不用詳慎乎人命攸關自當同仁一視自今年爲始凡外省重囚經秋審具題情實應決者爾法司亦照朝審之例三覆奏聞以副朕欽恤慎罰之至意○辛亥兵

部參奏允禩奉使口外不肯前往捏稱有旨令其進口竟在張家口居住得旨廉親王允禩議奏尋允禩議應作速行文仍令允禩前往差遣並將不行諫阻之長史額爾金交部議處得旨允禩既於途中私回不肯往今又何必令其出口伊既進口亦聽其自便至額爾金原非允禩意之所重何必治罪著允禩再議具奏允禩又議允禩奉使口外不肯前往捏旨進口應革去郡王撤其所屬佐領沒入家產解回交宗人府永遠禁錮得旨所奏著交諸王貝勒貝子公及議政大臣詳議具奏允禩卑鄙性成行止妄亂文學武藝蒙 皇考訓諭數十年終於一無所成平生無一事可以上慰 皇考聖心貽 皇考一日之悅豫抑且賦性陰險既不自知其庸懦無能又不肯安分守己恣意倔强覽廉親王所奏允禩惡蹟似無虛語數十年來朕諸兄弟各人行誼昭然在人耳目朕之

兄弟知之舉國孰不知之諸王大臣等務期各秉公忠自出意見
議奏儻稍有迎合之念又苟且照廉親王所奏議覆之處豈獨噶
壞爾等臣節更有何顏瞻拜 景陵且廉親王所奏或出至誠或
蓄他志在朕猶自遲疑未信此事惟賴諸王大臣公忠辦理著速
議具奏諸王大臣尋議允祇奉使不肯前往捏旨私自進口不法
已極應革去郡王撤回佐領交宗人府永遠禁錮得旨允祇之事
交與允禩者特以觀其如何處置向來允禩允禔允禞等俱聽允
禩指示即便遵行故朕望允禩教誨伊等使之改過乃不但不行
教誨反激成伊等妄爲朕所差遣之處竟不前往私回觀望居住
口外數月又稱奉旨進口如此不法任意妄行惟欲朕將伊等治
罪以受不美之名豈知此等無禮無義乖戾犯法之弟治之以罪
適足以昭朕無私之善政何礙之有朕今施以恩澤而不知感喻

以法令而不知懼朕自當明罰敕法雖係兄弟亦難顧惜諸王大臣理應將允祇素行與今所作之罪明白指陳或照允禩所議治罪或加等減等治罪之處請旨定奪朕自降諭旨○甲寅九卿等遵旨詢問御史田嘉穀楊纘緒會議焦宏勳一案不畫題又不另議緣由具奏得旨焦宏勳一案田嘉穀楊纘緒意見不合卽當兩議或將不畫題緣由繕摺奏聞不然卽應同三法司畫題具奏言官尙許風聞言事乃在與議之例旣不兩議又不奏明緣由又不畫題耽延命案是屬何心因朕問及耽延之故始知由伊等不畫題所致伊等旣故爲隱瞞設朕不問及不知伊等之不曾畫題竟照法司所議完結伊等必以爲人命案件三法司大臣官員不能詳審定案是以我等不曾畫題借此邀名干譽無所不至古人慎重民命每戮一人必謀之左右謀之大夫更謀之國人今縱不能

謀之國人如何與議官員內尙爾議論不能僉同況朕自卽位以來屢經面諭大臣官員務宜矢公矢慎同寅協恭不可稍有徧私拘執意見如有於心不合之處不妨奏聞朕自有定奪朕深望爾等之直言陳奏爾等自應仰體朕心直陳所見今觀田嘉穀楊纘緒之所爲是專務虛聲自樹黨援非愚昧無知卽其心叵測事雖微小亦不可不防微杜漸此風斷不可長田嘉穀楊纘緒著革職回籍今尙在三年之內故但令革職回籍如三年後大小臣工猶有各執己見邀譽盜名者朕必治以重罪○丙辰諭湖廣總督楊宗仁湖北巡撫納齊喀湖南巡撫魏廷珍等國家設立常平諸倉蓄穀積粟偶逢旱澇詳報踏勘往返察驗未免後時古人云備荒之倉莫便於近民而近民則莫便於社倉前諭爾等勸導建設蓋專爲安民起見也爾等自應轉諭屬員體訪各邑士民中有急公

尙義之心者使主其事果掌管得人出納無弊行之日久穀數日
增至於勸捐之時須俟年歲豐熟輸將之數宜隨民力多寡利息
之人務從乎輕取償之期務從乎緩如值連年歉收卽予展限令
至豐歲完納一切條約有司毋得干預至行有成效積穀漸多該
督撫亦止可具摺奏聞不宜造冊題報使社倉頓成官倉貽後日
官民之累朕初意如此孰料該督撫欲速不達令各州縣應輸正
賦一兩者加納社倉穀一石且以貯穀之多少定牧令之殿最近
聞楚省穀石見價四五錢不等是何異於一兩正賦外加收四五
錢火耗耶是爲裕國乎抑爲安民乎諭到該督撫速會同司道府
等官確商妥議務得安民經久之法以副朕意○戊午諭內閣朕
於朝會大興行禮有年見近來禮儀比前甚屬廢弛大非尊君敬
上之道我 皇考寬仁如天覆幬概予包容故稽察之大臣官員

遂皆視爲尋常並不約束糾參漸致玩忽朕今若不整肅嚴禁將來流弊無所底止夫朝堂之上大典攸關君臣之分大義所繫玩忽之人不得不以法治之朕御極以來屢有諭旨近又申飭嚴禁乃李建勳羅植於行禮之日紊越朝章顯違朕旨著將二人俱革職拏送刑部按法懲治並飭稽察御史侍衛等嗣後加謹嚴查有失儀者卽行糾參治罪○年羹堯奏侍衛達鼐副將紀成斌等領兵前往布哈色布蘇地方擒獲阿布濟車陳台吉再喀爾喀扎薩克沙爾都台吉前來投順報聞○癸亥總理王大臣奏青海大捷應獻俘 太廟恭請 皇上臨御午門受俘得旨平定青海寶乃皇考畱貽之功故捷音到日恭告 景陵今逆首妄吹拉克諾木齊阿爾布坦溫布藏巴扎布等三人檻送來京朕令議獻俘太廟之禮以慰 列祖在天之靈諸王大臣等乃議請受俘歸功

於朕非朕本意也可否止行獻俘不行受俘之禮諸王大臣等再
祭典禮具奏尋議出師凱旋執獲醜類獻俘廟社卽受俘於廷歷
代行之大典攸昭應請允行從之○宗人府參奏貝子允禔差往
西甯居住擅自遣人往河州買草踏看牧地抗違軍法肆行邊地
請將允禔革去貝子所有屬下佐領撤出爲旗下公中佐領得旨
允禔革去貝子撤出佐領之處俱著寬免○革辦理察罕安爾糧
餉侍郎薩哈布職以其侵蝕軍餉也○丁卯命資送流民銀兩有
餘贖者存貯五城備賑濟掩骼之用○年羹堯奏河州口外鐵布
等寨番人皆係青海所屬劫擄道路恣意妄行臣派署河州副將
岳起龍等帶兵進剿攻取四十一寨剿服三十七寨殺傷番賊二
千一百餘名擒獲人口牲畜無算報聞○己巳諭總理王大臣等
允禔不肯前往奉差地方並不請旨私自回來詐稱抱病任意出

入邊界朕已寬容數月伊豪無惶懼之意公然居住彼處近召入
王大臣等嚴降諭旨允祇料已稔悉亦竟不差一人前來謝罪奏
請殊失人臣之節著革去王爵調回京師永遠拘禁允祇之子與
伊家產及佐領下人員將如何措置並拘禁處所著各該管處另
行請旨○召王之麟來京以甘國奎爲浙江按察使

原任湖南按察使

○

辛未諭內務府爾衙門補放園頭弊端百出聞噶禮石文柱等入
官家人中富戶願爲園頭壯丁者百計鑽營希圖挑取賂遺園頭
倩人代役偷安暇逸又彼此相依爲姦營謀取利賄賂該管官員
撥給膏腴之產因此所給田畝肥瘠不均得瘠地者受累不堪此
等處朕知之甚悉爾等嗣後務秉公平必應行補放之人方可揀
選派給地畝務令均平並將斷不受人請託等語明白曉示則伊
等必自醒悟不至受人欺詐矣儻不悛改經朕訪知罪在爾等○

壬申增孔顏曾孟四氏學舉人中額一名

閏四月乙亥以覺羅塞德爲戶部額外侍郎仍兼左副都御史○
丁丑諭各省督撫社倉之設原以備荒歉不時之需用意良厚然
往往行之不善致滋煩擾官民俱受其累朕意以爲奉行之道宜
緩不宜急宜勸諭百姓聽其自爲之而不當以官法繩之也近聞
各省漸行社倉之法貯蓄於豐年取資於儉歲俾民食有賴而荒
歉無憂朕心深爲嘉悅但因地制宜須從民便是在有司善爲倡
導於前畱心稽覈於後使地方有社倉之益而無社倉之害此則
爾督撫所當加意體察者也又聞民間輸納錢糧自封投櫃亦屬
便民之法但偶有短少之處令其添補每至多方需索其數浮於
所少之外應將原銀發還仍於原封內照數補足交納庶可免多
索之弊此雖細事督撫大吏亦不可不畱心體察嚴飭有司以除

民累○命續纂大清會典○戊寅諭刑部朕披覽奏章其中人命案件如故殺謀殺者尙少而以鬪毆傷人者甚多或因口角相爭或因微物起釁揮拳操戈一時殞命及至於抵罪雖悔何追此皆由於愚賤鄉民不知法律因一朝之忿貽身命之憂言之可爲惻惻古有月吉讀法之典 聖祖仁皇帝上諭十六條內有講法律以儆愚頑一則蓋欲使民知法之不可犯律之無可寬畏懼猛醒遷善而遠過也但法律包舉甚廣一時難以徧喻爾部可將大清律內所載凡毆殺人命等條逐條摘出疏解詳明通行各省令地方有司刊刻散布於大小鄉村處張挂徧加曉諭風雨損壞仍復再頒俾知鬪毆之律尙然如此則故殺謀殺罪更可知父兄弟互相講論時存提撕警戒之心以化其好勇鬪狠之習庶命案可以漸少以副朕好生慎罰之至意○命左右兩翼各立宗學一所

揀選宗室四人爲正教長十六人爲副教長宗室子弟願入學者
分別教習清漢書讀書之暇演習騎射並月給銀米紙筆等項以
隆教育 上諭宗學正教長輔國將軍善福等朕惟睦族敬宗務
先教化嘗見宗室中習氣未善各懷私心互相傾軋並無扶持愛
護之意惟知寵厚妻黨姻婭其於本支骨肉視若讎敵殊爲悖謬
或因祖父昔日微嫌追念舊惡必圖報復卽如齊正額行事無狀
甘蹈匪僻以致重干法紀王貝勒之子孫妄自尊大任意奢侈不
顧禮義陷於罪戾者往往有之其將軍及閑散宗室不知自重狎
比小人蕩盡先人產業者尤爲不少昔我 皇考加恩宗室養育
栽培撫恤備至苟有片長薄技靡不收錄如普奇經希勒什亨等
皆曾擢用伊等不思感恩酬德反要結朋黨專事鑽營大負 皇
考委任之意且其居家素行亦多乖戾又如賴士不安本分蕩產

破家及其贖罪軍前仍不改過生事訐告此皆宗室中之可爲炯戒者朕嘗歎明代宗室年久繁衍失於訓教末流猥鄙至不可言誠恐朕之宗室日流日下不知前鑑深用爲憂是以亟籌保全之道若非立教設學鼓舞振興循循善誘安能使之改過遷善望其有成今特立義學揀選爾等教習宗室爾等隨其資質勸學興行導以禮義夫教訓之方漸摩陶淑非可責效旦夕也但須盡心竭力善爲開導毋避怨母倦怠教習久而禮義明自當遠惡從善或有不遵教訓罔顧廉恥有玷名教者小則爾等自行懲戒大則揭報宗人府會同奏聞其行止端方精勤好學者無論年齒長幼卽行保奏從來立教之術莫要於獎善懲惡善不獎不能使之勸惡不懲不能使之改爾等旣膺簡任其各平心靜氣屏除私意教訓宗室子弟如己之子弟懇懇然無毫髮不盡其心所頒諭旨令其

朝夕記誦如木鐸之儆眾俾皆覺悟自新庶幾積習可除翕然向化以協休風爾等務期勤慎黽勉恪供厥職以副朕篤厚宗親殷勤教育之至意○以貝勒滿都護協辦總理事務○癸未青海叛囚吹拉克諾木齊阿爾布坦溫布藏巴扎布解送至京遣官告祭太廟 社稷○諭順天府府尹京師廣甯門外向有普濟堂凡老疾無依之人每棲息於此司其事者樂善不倦殊爲可嘉 聖祖仁皇帝曾賜額立碑以旌好義爾等均有地方之責宜時加獎勵以鼓舞之但年力尙壯及游手好閑之人不得借名濶入其中以長浮惰而生事端又聞廣渠門內有育嬰堂一區凡孩穉之不能養育者收畱於此數十年來成立者頗眾夫養少存孤載於月令與扶衰恤老同一善舉爲世俗之所難朕心嘉悅特頒扁額並賜白金爾等其宣示朕懷使之益加鼓勵再行文各省督撫轉飭

有司勸募好善之人於通都大邑人煙稠集之處照京師例推而行之其於字弱恤孤之道似有裨益而凡人怵惕惻隱之心亦可感發而興起也○以謝賜履爲左副都御史仍管鹽務由兩淮鹽政右僉都御史

御史

○解程光琳任以余甸爲山東按察使

由糧道遷

○甲申兵部等

衙門議覆條奏內改併各衛所歸於州縣管轄一條查得各處軍民戶役不同未便歸併且武官科甲出身人員專選衛所守備千總若盡裁衛所必致選法壅滯應無庸議得旨此事部議所見甚小滇蜀兩省曾經裁減衛所未聞不便今除邊衛無州縣可歸與漕運之衛所軍民各有徭役仍舊分隸外其餘內地所有衛所悉令歸併州縣飭令直省督撫分別詳細區畫其武舉進士作何銓選不令壅滯之處吏兵二部詳議奏聞○乙酉諭戶部朕惟錢糧固屬緊要而民瘼尤宜體恤聞有州縣虧空錢糧百姓情願代賠

者此端斷不可開虧空之員未必愛民況百姓貧富不等斷無閭
縣情願代賠之理或係棍蠹勾連借端科歛或不肖紳衿一向出
入衙門通同作弊及本官被參猶冀題畱復任因而號召多事之
人連名具呈稱係閩縣願賠後官畏懼承追處分接呈入手卽差
役按里追呼名曰樂捐其實強派累民不淺嗣後紳衿富民情願
協助者聽其自行完納其有閩縣具呈者卽將爲首之人治以重
罪如府州縣官擅准派賠著該督撫查參重處至因公那移之項
依限全完定例准其開復嗣後督撫題報全完卽給咨本官令其
隨本引見朕觀其人可用者卽用如不可用以原品休致其年老
及不願補官之人亦於本內聲明給還原職不必來京爾部行文
直省督撫一體遵行○丙戌 上御午門受俘○以嵇曾筠爲河
南副總河

由兵部右
侍郎遷

○丁亥諭宗人府及部院大臣等宗室阿布

蘭朕素不深知在 皇考時伊於委任之事尙爲勉力廉親王又於朕前保奏朕因特加殊恩由輔國公晉封貝勒賞給佐領又令總理事務外人不知以爲阿布蘭曾奏聞二阿哥營書一事故爾擢用不知營書事敗阿布蘭尙自遲疑未奏係貝勒蘇努指使奏聞非其本心也阿布蘭自任用以來並不實心效力而且素行卑污前大將軍允禩自軍前回時伊特出班跪接從來宗室公於諸王阿哥並無此例也宗人府建立碑亭翰林院所撰之文阿布蘭以爲不佳另行改撰並不頌揚 皇考功德惟稱贊大將軍允禩擬文勒石朕卽位後伊自知誣謬復行磨去辦理旗務每每徇私近參奏佐領一事經朕交部查出傳示眾大臣似此罪惡種種朕是以交宗人府議處非有別意也再李英貴勒什亨俱朕施恩擢用之人因其不肖有負朕恩始行革退善則用之不善則退之朕

素性也 皇考每訓朕諸事當戒急用忍屢降 諭旨朕敬書於

居室之所觀瞻自儆今於阿布蘭既不加詳察任用太急今伊自
干不可寬宥之罪又難以用忍則 皇考訓誡之聖明益著而朕

亦知過矣阿布蘭應作何治罪之處爾部院滿大臣會同宗人府

定議具奏○以黃炳爲內閣學士陳世倌爲山東巡撫內閣學士○召

王朝恩來京以佟吉圖署浙江布政使原任山東布政使○辛卯免甯州

南昌等七州縣浮額銀一萬五千餘兩○乙未以班第爲內閣學

士由內閣侍讀學士遷○己亥諭兩江總督查弼納署江蘇巡撫何天培河

道總督齋蘇勒漕運總督張大有等京口一帶運河爲南北漕運

咽喉歷年以來挑濬淤淺皆係丹徒丹陽兩縣百姓派辦工役物

料俱出民間殊屬偏累此運河乃杭嘉湖蘇松常六郡共濟之河

而獨累兩縣之民其何以堪朕深爲軫念今後須確估每年經費

悉心會商或令地方官支用地丁錢糧或令河員專司其事於河
帑內動支開銷毋致累民更聞六郡向有協濟之例抑或共襄工
費以濟運道爾等確議奏聞以副朕愛惜黎元之意○庚子以塞
爾圖爲禮部尙書

由兵部
侍郎遷

五月癸卯朔夏至祭

地於

方澤恭奉

聖祖仁皇帝配享○

甲辰諭戶部朕惟漕運關繫甚大經費本無不敷而運丁恣行不
法者皆由官弁剝削所致如開兌之時糧道發給錢糧任意扣剋
運丁所得十止八九而運丁之都司監兌之通判又多誅求及至
啟行沿途武弁借催趲爲名百計需索又過淮盤查私貨徒滋擾
累究屬無益運丁浮費旣多力不能支因而盜賣漕糧偷竊爲匪
無所不至矣嗣後各省糧道給發錢糧不許剋扣分釐沿途武弁
不許借端需索運丁除包攬抗違外所帶些須貨物亦無庸苛刻

盤查至江浙船政同知經管修造糧船侵漁尤甚此官於漕政毫無裨益著卽裁去爾部行文各督撫不時查察如有仍前需索等弊立即指參從重治罪庶運丁漸有起色自必保守身家懷遵約束禁官弁之侵削卽所以戢旗丁之才悍也○諭河南巡撫石大焯等有人條奏河南河工買草辦運及搶工夫役州縣均派累里民覽之不勝駭異朕如此推心置腹任用爾等凡有累民之舉概令據實入告而爾等竟若罔聞致令乖方一至於此朕亦無可諭爾等也石大焯嵇曾筠田文鏡同看○增西安甘肅武鄉試中額○丙午諭刑部朕因朝儀不肅曾屢降諭旨申飭刑官司官李建勳羅植朝賀失儀此二人違旨大不敬本卽應正法但念卽位以來立心不以己意輕殺一人且係立法之初故令監候秋後處決以觀眾人知畏法與否若眾人仍不畏法秋後定行處決以爲大

不敬者之戒則此二人乃眾人殺之也後於受俘之日見班行整

齊祭壇之日亦皆敬謹夫二人之可殺者欲以明法也今既人人

皆知遵法是法已明矣則犯法之人可從寬宥乃眾人生之也可

將李建勳羅植免罪釋放勒令回籍並行文該地方官勿令出境

爾等將此旨交與內閣傳諭大小官員知悉○解蔡珽任以塞爾

圖署四川巡撫

由禮部
尙書署

○己酉宗人府等衙門奏阿布蘭負恩背

逆奏事不敬應革去貝勒撤去所賞佐領圈禁在家原襲輔國公

其子應不准承襲得旨阿布蘭著革去多羅貝勒仍令在輔國公

上效力行走將增賞之佐領俱撤出○庚戌命督撫提鎮於副參

游擊材勇有聲者保送引見○辛亥安南國王黎維禔遣使賀登

極並進歲貢命沿途增餽廩以示恩恤○甲寅諭諸王大臣等李

元璽等一案係伊等新犯之罪刑部宜照律審擬具奏今覽刑部

所奏將步軍統領衙門以李元璽照大光棍例拏送之舊案及遇赦寬免之處查出一併敘入本內夫伊等舊案與此案毫不相涉乃刑部援引敘入豈以李元璽之罪曾經 皇考寬免亦欲朕將李元璽等寬免耶抑以從前步軍統領將李元璽等爲大光棍送部之處俾朕知之卽行正法耶此明係以難處之事歸之朕躬欲以試朕也近日馬爾齊哈在朕前稱籩豆之事則有司存是譏朕不當察及細務其心欲朕不加詳察則伊等可以邀結黨與任意擅行夫古帝王明四目達四聰舜好問而好察邇言故上下之情不至壅隔閭閻疾苦利弊無不周知古人云黈纆充耳前旒蔽明亦有所謂而云然也馬爾齊哈粗識數字便於朕前誦述古語妄行瀆奏註云道之全體固無不該然其分則有司之守非君子之所重並非謂全不畱心也如耕田播種乃農夫之事講誦訓詁亦

屬文士之業若云不親細務朕又何用行耕藉詣學之典乎國家
設官分職各有專司而總攬萬幾全在一人之裁決但云委諸有
司則六部之事付之六部爲天子者惟有端默高拱而已豈不爲
逸但天下之事可以如此料理乎朕以刑部事件民命攸關所繫
非小務期明罰敕法簡孚愼恤每案必詳審再三求其至當始愜
於衷而欲朕付之不見不聞可乎若云有司則刑部尙書侍郎非
大有司乎今所辦事件顛倒如此有司甯可恃哉馬爾齊哈向在
各旗行醫朕以伊行醫之人必然好生其爲人似尙坦率卽位後
海墮刑部侍郎當感恩思報竭力盡忠以奉君上而猶不改舊習
存從前分黨之念其始召見時卽禮貌疏略絕無對君恭敬之意
聞其在乾清門與大學士列坐共食曾降諭旨嚴飭令其改過今
又以曾子語譏諷朕躬設令朕或有不當何妨直陳其事冀朕採

擇而爲此隱約之詞狂妄甚矣朕御極以來用人行政自返絕無過當朝廷清肅亦無攬權怙勢之人總理事務王大臣皆皇考素所信重遵奉皇考遺旨輔佐朕躬而非其願者每懷嫉妬輒以絕無影響之事加之此皆有意擾亂國政造言生事者之所爲也爾等心所不快之人欲借事巧傷朕確有成見豈爲宵小所動搖乎皇考常言每事當防微杜漸朕服膺聖訓爾等稍萌邪僻之念朕斷不能隱默也朕用人任使全出至公而無知小人妄生議論謂朕聽用總理事務大臣之言所用者皆係伊等親友伊等俱係皇考簡用之人非朕卽位後所特擢也今朝廷之上俱是皇考時所用大臣朕豈有私乎馬爾齊哈係蘇努之黨觀其行事伊等結引黨與至今猶未散解朕屢申諭旨告誡諄切望伊等洗心滌慮將從前結黨倣倖之想悉行改除伊等自求全身

家可以永保若執迷不悟以懷二三不竭力扞誠爲朝廷效力則
伊等自干國法斷不輕貸嗣後如馬爾齊哈仍似從前狂悖諸王
大臣見卽參奏拘拏故特諭知○丙辰諭諸王大臣等廉親王允
禩今日具奏貝子允禔事又將議處滿丕事一併具奏謂之無心
可乎再議處滿丕案內並不將總兵等官取供遽行草率擬罪向
來定例有如此者乎皆因前日朕於馬爾齊哈案內言及蘇努之
故是以間日一次欲以擾亂朕心耳從前 皇考時審訊與允禩
相面之張明德供出賴士普奇一案 皇考在乾清門降旨曰蘇
努之祖阿爾哈圖土門貝勒褚英薨逝時 太宗特降諭旨云此
人若在必亂國家大抵此一宗支向日原有嫌隙卽如蘇努於我
父子兄弟骨肉之中讒譖離間暗中鑽營惟擾亂國家事務朕防
之有年矣爾等其知之每事畱意此 諭旨乃眾阿哥及諸大臣

等所共聞也朕卽位後於蘇努格外加恩晉封貝勒伊子勒什亨
委署領侍衛內大臣亦冀伊等感朕寬大之恩遷善改過耳詎意
勒什亨並不感戴仍袒護貝子允禔扶同隱匿將所交事件故爲
遲延及朕將勒什亨派往西甯伊弟烏爾陳指稱武備院奏事入
內於朕前顯露憤恨之容勒什亨係獲罪之人例不得奏請訓旨
而烏爾陳將伊兄引入紫禁城內殊屬不合是以並將烏爾陳同
伊兄發往軍前今蘇努以七十病故退有後言是仍念伊等舊日
黨與擾亂國家之心毫無悛改也蘇努不可畱在京師煽惑眾心
著革去貝勒其屬下佐領著撤回存貯公所止畱伊府佐領著伊
同在京諸子於十日內帶往右衛居住到彼之後若不安靜自守
仍事鑽營差人往來京師定將蘇努明正國法○庚申諭總理王
大臣朕從前曾諭外省文武大臣等凡陛見來京不必進獻一切

物件朕近日將鎮協等官調來引見特欲識認其人詢問地方事務理應輕騎速來不可帶食物進獻嗣後著永行禁止○諭直省督撫前四川巡撫蔡珽題報重慶府知府蔣興仁病故本到之日朕聞蔣興仁之死乃係自盡特令蔡珽明白回奏乃蔡珽回奏仍復支吾不明夫一介小民偶有此事尙必報明官長詳察情節焉有身叨一命而輕生若此必有萬不得已之情或係本人犯法畏罪或被上司偏勒或受同事欺陵斷非無因豈容草率含糊冀逃國法嗣後大小職官若有此等之事該督撫嚴實具奏○年羹堯奏莊浪之謝爾蘇部落番人首倡爲惡擅據桌子山碁子山又涼州南崇寺之沙馬拉木扎木巴等與蒙古通連去年曾搶掠新城張義等堡再郭隆寺郭莽寺逃出之喇嘛煽惑西甯之納朱公寺朝天堂加爾多寺番人與莊浪番賊串通並不歸順臣與岳鍾琪

及在西甯大臣等商議派兵分十一路於四月十五日由西甯進發後據岳鍾琪等陸續報稱納朱公寺喇嘛番人俱經投順卽於朝天堂添設小張家胡土克圖居住至加爾多等番人派副將紀成斌張玉總兵黃喜林等分兵四路直抵賊穴殺賊數百其餘死在溝河者甚多寺亦焚毀又據遊擊馬忠孝王大勳等殺賊於和石溝遊擊王序吉范世雄敗賊於石門口涼莊道蔣洞殲賊於喜達堡而前鋒統領蘇丹率兵至旁伯拉夏口番人假稱來投察其情形可疑令人偵探則眾賊伏匿放槍遂率官兵直抵賊穴殺賊甚眾又涼莊道蔣洞按剿基子山破賊於巴洞溝土司魯華齡殺賊於天王溝前後按剿殆盡其爲首謝爾蘇之番賊阿旺策凌被先密寺喇嘛擒獲解送岳鍾琪又領兵至鎮羌探得賊人俱在木茂山卽派員率兵截阻殺賊甚眾其賊人棄妻子逃去隨畱總兵

官宋可進涼莊道蔣洞統兵五千名暫駐防守又守備馬光在寬溝地方殺賊二十餘人眾俱逃散再查先密寺番人順逆無常且與碁子山賊穴相連恐後日復聚生事令伊等喇嘛番眾俱移於加爾多寺之外居住其先密寺卽行焚毀得旨桌子山碁子山番賊甚屬兇頑倚恃地方危險屢行劫掠大將軍年羹堯籌畫調遣令奮威將軍岳鍾琪等統率官兵進剿於山險林密之處奮戰五十餘日盡行剿滅勉效力克奏膚功永靖邊塞甚屬可嘉此次勲績著大將軍年羹堯及岳鍾琪等弁兵俱從優議敘○辛酉禮部等衙門遵旨議奏古昔聖王制祀凡有道有德施教於學者祀於瞽宗漢文翁立學宮於成都首祀孔子又畫七十二子於壁此諸賢從祀之始也厥後有功經傳皆得從祀謂之經師自唐至明歷代進退不一而當代賢儒得預於祀典蓋自宋始伏讀 聖諭

云附饗廟廷諸賢或有先罷而今宜復者臣等議得明嘉靖時釐定祀典改祀於鄉者七人林放蘧瑗鄭康成鄭眾盧植服虔范甯罷祀者四人秦冉顏何戴聖何休今俱宜復其從祀也 聖諭云有舊缺而今宜存者臣等公同詳考先儒事實請增入兩廡從祀者共十八人孟子門人樂正子公都子萬章公孫丑漢諸葛亮唐陸贄宋韓琦尹焞黃幹陳淳何基王柏金履祥許謙陳澧明羅欽順蔡清本朝陸隴其允宜增入祀典者也 聖諭云或有可升而附祀者臣等議得宋張子橫渠之父張迪一人可以附入崇聖祠者也 聖諭云先儒先賢之後孰當增置五經博士臣等議得孔門弟子冉伯牛仲弓冉求宰予子張有若六子均宜確訪嫡裔賜以世襲五經博士以昭崇報者也以上四條恭候 睿鑒裁定得旨先儒從祀 文廟關繫學術人心典至重也宜復宜增必詳加

考證折衷盡善庶使萬世遵守永無異議爾等所議復祀諸儒雖
皆有功經學然戴聖何休未爲純儒鄭眾盧植服虔范甯謹守一
家言轉相傳述視鄭康成之純質深通似乎有閒至若唐之陸贄
宋之韓琦勳業昭垂史冊自是千古名臣然於孔孟心傳果有授
受而能表彰羽翼乎其他諸儒是否允協以及宰予冉有增置博
士之處著再公同確議務期至當不易具奏○壬戌諭總理王大
臣等七十馬爾齊哈常明等皆貢緣妄亂之人伊等皆廉親王之
黨七十原爲阿靈阿謀主各處鎖營阿爾松阿視爲恩人在戶部
時專主戶部之事今在刑部又專主刑部之事凡小有才者俱被
引誘愚懦又畏懼其威並入伊黨常明業已正法伊等俱在八旗
王大臣並近侍人家或用逢迎或用離間又有暗地鎖營者數人
朕悉知之但不遇事發姑不深究伊等悔心悛改則已若仍固執

不改伊等斷不能掩朕之耳目也七十自許墅關差回隱匿半年
任內浮額稅銀數萬朕俱加寬宥止令出銀數千兩爲朕弟莊親
王修理府第理應踴躍效力乃竟不感戴寬宥之恩並不作速全
完遷延至今不肯交納且又造言怨望經莊親王具奏朕著莊親
王將七十圈禁伊府內令其交納無論何人求爾爾卽奏聞七十
仍復怠玩反營求裕親王差蘇克肫屬託布達時照看朕御極之
初卽諭諸王大臣曰彼此結黨互相戕害甚屬惡習爾等當以朕
之所好者好之所惡者惡之是非盡一則姦黨無自而起善者朕
所嘉美爾等一體嘉美之則其人愈加鼓舞以向於善他人亦企
慕效法之矣惡者朕所賤惡爾等亦一體賤惡之則其人無地自
容亦可望其悔悟改矣傳曰唯仁人能好人能惡人羣臣當輔
朕以成仁人果能盡言規諫朕並無所拒抑也昔日 皇考時凡

被譴責之人本出於至公至當而內有黨同袒庇者稱爲冤抑眾
皆隨聲附和素有讎者亦解其讎素不識面者轉成相識本人亦
忘其有應得之罪隨眾自稱冤抑誠爲惡習人臣事君當同德同
心協力和衷乃國家之福卽不得已亦當致身盡忠直言進諫何
故竟效此最下惡習朕甚不解其故今將是非所在聽君上之自
爲王大臣等專擅行私於下可乎如此則各自爲黨矣欲除朋黨
之源當令舉國內外共爲一心旣爲一心則是非與予一人同之
朕有過誤大臣進忠諫諍朕必將用其譴論鑒其忠心其人亦足
垂名萬世何故行此無父無君小人之行乎朕在藩邸甚惡此風
斷不爲其所染廉親王至今與朕結怨亦卽此故今廉親王之意
不過欲觸朕之怒多行殺戮使眾心離散希圖擾亂國家耳如此
天豈肯如其願乎古人云亂臣賊子人人得而誅之 皇考每引

述此語特指廉親王言之乃至今朋黨之人尙猶未息不知君臣大義之輕重效法眾人惡習其事難以枚舉今七十等貴緣妄亂之人若不繩以國法則憲典不行矣見今審理七十按查家產俟查完之時著阿爾松阿馬爾齊哈奏聞七十著革職擊交阿爾松阿馬爾齊哈聽其作何處分阿爾松阿馬爾齊哈往查七十家產細微物件不得藏匿阿林保布達時亦往協助其查出之家產仍給莊親王爲修府之用諸王大臣等此後專心一志輔翼朕躬成全仁人之名同好其所當好同惡其所當惡如仍固執不改各爲一是非朕亦不得不執法從事矣爾等謹識朕言實心奉行以副朕好生慈愛之至意此事可徧諭八旗文武大臣官員知悉○諭自西陲逆賊羅卜藏丹津等背棄國恩招集同惡殘其骨肉侵犯邊城朕命年羹堯揆度機宜指麾將士犁庭掃漠迅奏膚功惟逆

賊犯塞之初邊民略被騷擾克敵之後居民安堵不知有兵且士馬有飽騰之歡閭閻無轉運之苦支用錢糧一無糜費昨因野番掠劫成性出沒無常又令奮威將軍岳鍾琪領兵按捕餘孽將士用命於深山林木之中轉戰五十餘日俱已蕩平從此鋒鏑永清疆圉開拓今具奏善後事宜十三條又定禁約青海十二事運籌周密措置精詳朕心嘉悅之至其所奏善後諸事皆合機宜惟新闢地方宜廣屯種而欲令五省有罪之人發往開墾恐此等之人未必習於耕種又無室家可以羈畱於邊塞之處少當畱意耳爾等一併悉心妥議具奏○諭禮部內廷太監及王公家太監之爲民者率多在京居住此輩最好生事不可容畱俱著回籍如內有六十五歲以上曾經效力因得殘疾而爲民者許其在京居住令總管太監奏聞其一應回籍者著行文該地方嚴查如不在本地

方居住又往別省將該地方官一併從重治罪○丙寅以黃炳署刑部侍郎仍在內閣學士裏行○戊辰諭宗人府弘春朕加恩授爲貝子令其效力行走乃伊父及伊伯廉親王每事逼迫禁止伊父伊伯旣不願其在朕前效力弘春著革去貝子○總理王大臣遵旨議奏年羹堯奏青海善後事宜十三條一奏稱青海各部落人等宜分別功罪以加賞罰也從前羅卜藏丹津侵犯內地時貝勒色卜騰扎爾力拒及賊人侵犯西川南川時營報信息並未出兵協助卽首先投誠並引策凌諾爾布羅卜藏察罕等來投台吉噶爾丹戴青始終未助賊人且與貝勒益蘇克汪扎爾力戰吹拉克諾木齊又隨大兵出口亦爲效力扎薩克阿喇布坦係察罕丹津之婿隨大將軍進剿效力均應請加封爵以示鼓勵應如所請色卜騰扎爾晉封郡王噶爾丹戴青封爲貝子阿喇布坦封爲輔

國公又奏稱俘獲之諾顏格隆乃圖爾古特台吉今已爲喇嘛隨
提督岳鍾琪在軍前效力貝勒益蘇克汪扎爾從前雖助逆賊後
知悔過投誠擒賊贖罪應與投誠之公策凌諾爾布畱其原封之
爵以示寬大應如所請各復伊等原爵又奏稱輔國公羅卜藏察
罕台吉濟濟克扎布雖經投順從前與貝子阿布布坦巴爾朱爾
阿喇布坦擾亂內地請革爵爲民貝勒策凌敦多卜貝子拉查卜
雖經投誠但久助逆賊應降其所封之爵以示懲戒應如所請羅
卜藏察罕濟濟克扎布革爵爲民策凌敦多卜降爲貝子拉查卜
降爲鎮國公一奏青海部落宜分別游牧居住也請照依內扎薩
克編爲佐領以申約束每百戶編一佐領其不滿百戶者爲半佐
領將該管台吉俱授爲扎薩克於伊等弟兄內揀選授爲協理台
吉每扎薩克俱設協領副協領參領各一員每佐領俱設佐領驍

騎校各一員領催四名其一旗有十佐領以上者添設副協領一員佐領兩員酌添參領一員備蒙俞允請將一等侍衛副都統達鼐暫畱辦理其每年會盟奏選老成恭順之人委充盟長不准妄行私推以致生事滋擾均應如所請一奏稱朝貢交易宜按期定地也請自雍正三年起於諸王台吉內派定人數令其自備駝馬由邊外赴京請安進貢青海諸王貝勒應分作三班三年一次九年一周其餘內地之人互相交易之處則定以每年二月八月二次交易俱以邊外爲集臣選得西甯西川邊外有那拉薩拉地方請指定爲集不准擅移屆期仍令總兵官飭委營弁領兵督守如有擅進邊牆者卽行懲治應如所請但各蒙古需用茶葉布疋等物交易之期過遠必致窮乏應令四季交易又奏稱羅卜藏丹津所屬垂察桑係首先歸順之人應令於松潘口外駐牧授爲土百

戶職銜丹忠部下寨桑噶隆色卜騰達什等率領數百餘人赴松
潘投順見住潘州應給以千戶百戶文憑均應如所請一奏稱喀
爾喀厄魯特之四部落宜不屬青海也查伊等原非被虜之人今
青海諸王台吉內之投降者咸歸仁化助逆者俱已被擒而喀爾
喀內有隨大兵投降者宜乘此軍威遠振將不願爲青海屬人之
喀爾喀等照青海例編旗分爲佐領添設扎薩克等分駐勦滅逆
賊之舊地其情願歸本處者聽其自便則青海之勢可分而喀爾
喀台吉等無不感恩報效應如所請一奏稱西番人等宜屬內地
管轄也查陝西之甘州涼州莊浪西甯河州四川之松潘打箭鎰
裏塘巴塘雲南之中甸等處皆係西番人等居住牧養之地自明
以來失其撫治之道或爲喇嘛耕地或爲青海屬人交納租稅惟
知有蒙古而不知有廳衛營伍官員今西番人等盡歸仁化卽係

內地之良民應相度地方添設衛所以便撫治將番人心服之頭目給與土司千百戶土司巡檢等職銜分管仍令附近道廳及添設衛所官員管轄其應納糧草較從前數目請略爲減少以示寬大至近邊居住帳房逐水草游牧者仍准伊等照舊游牧均應如所請一奏稱青海等處宜加約束也查青海巴爾喀木藏危乃唐古特四大部落顧實汗占據此地以青海地面寬大可以牧養牲畜喀木地方人眾糧多遂將伊子孫分居此二處伊則在青海游牧居住喀木地方爲伊等納貢藏危二處從前原施捨爲達賴喇嘛班禪喇嘛香火今因青海叛逆取此一帶地方交四川雲南官員管理達賴喇嘛向差人赴打箭鑪貿易每馱向又木多乍了巴塘裏塘居住喇嘛索取銀兩不等名爲鞍租至打箭鑪始行納稅請飭達賴喇嘛等不准收受鞍租並飭打箭鑪收租官員亦免其

納稅再每年請賞給達賴喇嘛茶葉五千斤班禪喇嘛減半賞給均應如所請一奏稱喇嘛廟宇宜定例稽察也查西甯各廟喇嘛多者二三千少者五六百遂成藏垢納污之地番民納喇嘛租稅與納貢無異而喇嘛復私藏盜甲器械前羅卜藏丹津侵犯時喇嘛等帶領番民與大兵抗衡今臣於塔兒寺喇嘛內之老成者揀選三百名給與大將軍印信執照諭令學習清規請嗣後定例寺廟之房不得過二百間喇嘛多者三百人少者十數人仍每年稽察二次令首領喇嘛出具甘結存檔至番民之糧應俱交地方官管理每年量各廟用度給發再加給喇嘛衣服銀兩庶可分別其賢否地方官得以稽察均應如所請一奏稱邊防宜嚴界限也查邊外自黃河入中國之處至於河州西甯蘭州中衛甯夏榆林莊浪甘州等處其間水草甚佳林麓茂密乃棄此不守以致蒙古等

占據大草灘之地將常甯湖爲牧廠是以各處相通竟無阻礙請於西甯之北川邊外上下白塔之處自巴爾托海至扁都都口一帶地方創修邊牆築建城堡則西番人等肆行掠攘之區悉成內地又肅州之西桃資河常馬爾鄂敦他拉等處俱膏腴之地應令民人耕種布隆吉爾地方修城駐兵之後可漸至富饒至甯夏險地無過於賀蘭山顧寶汗之諸孫及額駙阿保等向俱在山後居住游牧今竟移至山前請令阿寶等嚴飭所屬仍照前在賀蘭山後居住游牧則山前營盤水長流等處俱爲內地均應如所請一奏稱甘州等處宜添設官弁也查甘州西甯疆界相連應於此二處設立營汛至於青海巴爾虎鹽池自古原係內地後竟棄爲塞外蒙古等至西藏噶斯等處必於此處經過應速取回於新設邊內大通河設立總兵一員兵三千名管轄中左右三營於大通南

邊設立參將一員兵八百名大通北邊設立遊擊一員兵八百名
鹽池地方設立副將一員及左右都司二營兵一千六百名四川
邊外單噶爾斯地方移鎮海營參將駐紮兵一千名再拉科閭門
等處各設守備一員兵二百五十名恆鈴子地方移南川守備駐
紮兵五百名南川舊營畱千總一員兵一百名至西南地方宜改
設同知移西甯通判駐紮鹽池令其辦理稅務再河州保安堡應
設遊擊一員千把總各一員兵四百名歸德堡應添設把總一員
兵二百名俱隸西甯總兵道員管轄則蒙古等不敢覬覦番民等
亦有所依仗均應如所請一奏稱打箭鑪等處亦宜添設官弁也
查青海既已平定應將巴爾喀木處人等悉行收集除羅隆宗之
東又木多乍了地方俱隸胡土克圖管轄外其餘番眾頭目等俱
應給與印信執照與內地土司一體保障打箭鑪之外木雅吉達

地方應設總兵遊守千把等官兵二千名雅龍江中渡處設守備一員千總二員兵五百名裏塘巴塘之吹音等處設守備一員兵二百名裏塘地處四衝應設副將一員都司一員兵一千二百名鄂洛地方各路咽喉應設參將一員兵六百名巴塘係形勝要地應設遊擊一員兵五百名宗都地當雲南孔道應設參將一員兵一千名俱令新設之總兵統轄以爲雲南四川兩省聲援又青海所屬左格等處番人應亟移於內地再阿巴之土司頭目墨丹住等帶兵進剿屢次建功應給與安撫司職銜不隸青海管轄又黃勝關外潘州舊城應設遊擊一員兵六百名河巴地方山河圍繞應設副將一員都司一員兵一千五百名黃河兩邊渡口應設守備一員兵三百名悉隸松潘總兵統轄裏塘添設同知一員令其管理兵糧收納番民貢賦則南至滇省北至陝省俱可援助均應

如所請一奏稱邊地弁兵宜歸併裁汰也查西甯地方設立總兵
留兵四千即可敷用應裁五百名歸併於大通鎮屬甘涼莊浪等
處其餘營汛兵丁可裁一千名甯夏既添駐滿兵其綠營兵丁亦
可裁汰一千改爲四營將後營遊守千把等員補入大通鎮標四
川重慶川北二鎮應改設副將都司守備千把等員裁汰總兵官
二員遊擊六員遵義夔州兩協遊擊各二員亦行裁汰化林副將
一員額兵一千名應改爲遊擊一員留兵五百名均應如所請一
奏稱邊內地方宜開墾屯種也查西甯邊牆內俱屬可耕之田布
隆吉爾地方見在修築城垣請將直隸山西河南山東陝西五省
軍罪人犯盡行發往大通布隆吉爾等處令其開墾查西甯本處
人民與駐大通三千兵丁之子弟親戚情願往種者正不乏人大
通河地方不必發遣犯人惟布隆吉爾地方遠居邊外願去之人

甚少應如所請行文刑部並直隸山西河南山東陝西五省會妻軍犯內除賊盜外有能種地者卽發往布隆吉爾地方令地方官動支正項錢糧買給牛具籽種三年後照例起科一奏稱番人部落宜加撫綏也今兵事已竣臣應遵旨回西安辦理三省事務暫令奮威將軍岳鍾琪駐紮西甯畱兵四千名聽其管束其撫遠大將軍印信見今策妄阿喇布坦遣使請罪應俟撤回各路將軍時臣卽行恭繳收貯內庫再甘州地方黃番各部落乘此軍威收聚撫綏亦可抵禦青海臣同岳鍾琪會商俟七八月馬匹肥壯時親率兵丁由西甯口外到甘州地方招撫番民均應如所請至年羹堯奏請禁約青海十二事一朝見進貢定有限期一不准自稱盟長一番子唐古特人等不許擾累一喀爾喀輝特圖爾古特部落不許青海占爲屬下一編設佐領不可抗違一內外貿易定地限

時以上六事臣等已於善後事宜內議定其餘六事一背負恩澤必行剿滅一內地差遣官員不論品級大小若捧諭旨王公等俱行跪接其餘相見俱行賓主禮一恪守分地不許強占一差員商賈往過不許搶掠一父沒不許娶繼母及強娶兄弟之婦一察罕諾門汗喇嘛廟內不得妄聚議事均應如所請得旨所議甚屬周詳依議○己巳諭刑部朕從前並未認識七十但聞其行止今又適遇此事七十常明馬爾齊哈等在王大臣家往來鑽營不但朕知之舉國誰不知之七十在部中專主事件平日又不安靜今大臣等因朕一時之怒請將七十正法朕若日後追悔大臣等亦不可當爾等會同議政大臣三法司秉公詳議具奏如有不便畫一之處各抒所見另議具奏若不秉公議奏卽是負朕之恩○庚午諭諸王大臣等德甯蒙 聖祖仁皇帝擢至大臣之列身沐 聖

祖仁皇帝隆恩毫無圖報之心悠忽玩愒捏稱足疾希圖推諉並不效力行走深負 聖祖仁皇帝簡用之恩且素行不安本分鑽營允禩令伊子永端在軍前跪求允禩在侍衛班內行走永端既願爲允禩效力著發往跟隨允禩再德甯前住江南時多方圖利飽其私橐又聞伊曾經強占人家產之事爾等可將伊家產查明抵補虧空之項酌畱伊養贍之貲外其餘查明應行給還之人定議具奏德甯身爲宗室而似此夤緣請託有玷天潢若不加懲創則眾何以知儆戒也

六月丙子以裕親王保泰管禮部隆科多兼理理藩院○戊寅免江南浙江福建陝西康熙五十年以前逋賦九十四萬一千六百餘兩○庚辰闕里 聖廟災○辛巳尊封 聖祖仁皇帝皇貴妃貴妃 密妃 定妃 通嬪○癸未大學士王碩齡以年老請

致仕溫旨慰畱之○諭內閣諸老臣皆係 皇考簡用貽朕之人
如因衰老休致朕心不忍大學士王項齡著仍在內閣辦事年邁
之人間時行走可也○諭刑部刑法上關天和下繫民命實爲政
治之要朕御極以來讞斷必加詳慎務期當罪而得其平惟明克
允所以體天心而重民生也向來八旗官軍人等待家人過嚴微
小之失甚至毆責斃命奴僕雖賤彼亦人子況性命攸關何得任
意荼毒朕於刑部成獄除強盜故殺謀殺等犯不得不依律正法
其餘罪犯略有可恕者俱行寬免從未降旨特殺一人朕大君也
於有罪者尙不忍輕加刑戮爲臣下者乃可毆死無辜之奴僕乎
且奴僕奔走服勞又性多愚暗易獲過愆全賴上人之矜恤而原
宥之卽有酗酒冒犯之處應加懲治亦不宜過重致於死地以逞
一時之憤怒該部卽行文曉諭八旗嗣後務宜待下以寬不得擅

自毆死家人凡遇毆斃家人詳其情罪分作三等定例議奏尋議凡旗人奴僕違犯教令家主依法決罰致死及過失殺者仍照舊例不論外其官員違法責打奴僕致死及持刀殺死者分三等定以罰俸降革鞭責平人犯者分二等鞭責枷號至官員平人有致死族中家僕者各從重擬八旗畫一遵行從之○命吏部尙書田從典協理大學士○調景日昫爲禮部右侍郎蔣廷錫爲戶部右侍郎○涂天相緣事降調以黃炳爲刑部左侍郎仍兼內閣學士行走○乙酉以平定青海撰文勒石國學頒發直省以昭功德文曰我國家受 天眷命撫臨八極日月所照罔不臣順遐邇乂安兆人蒙福乃有羅卜藏丹津者其先世願實汗自國初稽首歸命當時使臣建議畀以駐牧之地其居雜番羌密近甘涼我 皇考聖祖仁皇帝睿慮深遠每廬於懷旣 親御六師平定朔漠威靈

所加青海部落扎什巴圖爾等震懼承命 聖祖仁皇帝因沛殊
恩封爲親王兄弟八人咸錫爵祿羈縻包容示以寬大而狠心梟
性不可以德義化三十年來包藏異心朕紹登寶位優之錫賚榮
其封號尙冀革心緝甯部眾而羅卜藏丹津昏謬狂悖同黨吹拉
克諾木齊阿爾布坦溫布藏巴扎布等實爲元惡謂國家方宏浩
蕩之恩不設嚴密之備誕敢首造逆謀迫脅番羌侵犯邊城反狀
彰露用不可釋於天誅遂命川陝總督太保公年羹堯爲撫遠大
將軍聲罪致討以雍正元年十月師出塞自冬涉春屢破其眾凡
同叛之部落戈鋌所指應時摧敗招降數十萬眾又降其貝勒貝
子公台吉等二十餘人朕猶閔其蠢愚若悔禍思愆束手來歸尙
可全宥而怙惡不悛負險抗違仍決翦滅之計以方略密付大將
軍年羹堯調度軍謀簡稽將士用四川提督岳鍾琪爲奮威將軍

於仲春初旬禡牙徂征分道深入搗其窟穴電掃風馳按剔巖阻
賊徒倉皇糜潰窮蹙失據羅卜藏丹津之母及謀逆渠魁悉就俘
執擒獲賊眾累萬牲畜軍械不可數計賊首逃遁我師踰險窮追
獲其輜重人口殆盡羅卜藏丹津子身易服竄匿荒山殘喘待斃
自二月八日至二十有二日僅旬有五日军士無久役之勞內地
無轉輸之費克奏膚功永清西徼三月之朔奏凱旋旅饒歌喧轟
士眾訢喜四月十有二日以倡逆之吹拉克諾木齊等三人獻俘
廟 社受俘之日臣民稱慶伏念 聖祖仁皇帝威靈振於遐
方福慶流於奕葉用克張皇六師殄滅狂賊行間將士亦由感激
湛恩厚澤爲朕踴躍用命斯役也芟夷凶悖綏靖番羌俾烽燧
永息中外人民胥享安阜實成 先志以懋有不績廷臣上言稽
古典禮出征而受成於學所以定兵謀也獻馘而釋奠於學所以

告凱捷也宜刊諸珉石揭於太學用昭示於無極遂爲銘曰 天
有雷霆聖作弧矢輔仁而行威遠甯邇維此青海種類實繁錫之
茅土列在藩垣被我寵光位崇祿富負其阻遐禍心潛構恭維
聖祖慮遠智周睠念荒服綏撫懷柔朔野旣清西陲攸震爵號淳
加示之恩信如何兇狡造謀逆天鼓動昏愍寇侵於邊惟彼有罪
自干天罰桓桓虎貔爰張九伐王師卽路冬雪初零日耀組練雪
響輦鉦蠶茲不順敢逆戎旅奮張螳臂以當齊斧止如山岳疾如
雨風我戰則克賊壘其空彼昏終迷曾不悔戾當翦而滅斯焉決
計厲兵簡將往擣其巢踰歷嶠嶮坦若坳郊賊棄其家我繫而獲
牛馬谷量器仗山積蹇兔失窟何所逋逃枯魚游釜假息煎熬師
以順動神明所福旬日凱歸不疾而速殪彼逆謀懸首藁街獻俘
成禮金鼓調諧西域所瞻此惟雄特天討旣伸羣酋惕息囊戈偃

革告成辟雍聲教遐暨萬國來同惟我 聖祖親平大漠巍功煥

文邁桓軼酌流光悠久視此銘辭繼志述事念茲在茲○山西布

政使高成齡摺奏臣見內閣交出請禁提解火耗之條奏臣伏思

直省錢糧正供之外向有耗羨雖多寡不同皆係州縣入己但百

姓既以奉公卽屬朝廷之財賦臣愚以爲州縣耗羨銀兩自當提

解司庫以憑大吏酌量分給均得養廉且通省遇有不得已之費

卽可支應而分派州縣借端科索至以羨餘賠補虧空今撫臣諾

岷將每年存貯耗羨銀二十萬兩畱補無著虧空之處先經奏明

臣請 皇上敕下直省督撫俱如山西撫臣諾岷所奏將通省一

年所得耗銀約計數目先行奏明歲終將給發養廉支應公費畱

補虧空若干之處一一具摺陳奏則不肖之上司不得借名提解

自便其私如條奏所慮矣 諭此事著總理事務王大臣九卿詹

事科道平心靜氣秉公持正會議少有一毫挾私尙氣阻撓不公者國法具在斷不寬宥各出己見明白速議具奏如不能畫一不妨兩議三議皆可○庚寅諭吏部直省督撫統轄屬員必中正和平推誠體察屬員有一善則獎勵誘掖以成之其微瑕小疵則多方訓導使之省改必至怙惡不悛方據實題參如此始能激濁揚清於地方有益若妄自尊大暴戾恣睢甚至一言不當卽加叱辱如四川巡撫蔡珽慢罵屬官以致重慶府知府蔣興仁憤激而死似此褊急任性不惟有乖大臣之體且恐屬吏相率顧畏阿順取容喪其氣節尙欲建立功名安可得乎爾部行文各督撫須仰體朕意正己率屬虛懷待下卽檄行申飭亦無慢罵之理至尊卑相見有一定典儀毋得倨傲致長諂諛之風其部院堂官亦當和衷翕受待屬以禮始不負朕委任之意○魏廷珍緣事革職以王朝

恩爲湖南巡撫實授佟吉圖浙江布政使○實授博爾多山東布政使○壬辰刑部等衙門奏七十應卽正法得旨七十行爲妄亂應行正法但朕自御極以來除強盜故殺謀殺人犯外並未降旨特殺一人七十雖應處斬亦不足以當朕之初命正法之人常明之惡甚大 皇考亦未加戮但行發遣後在發遣處仍復妄行始行正法七十著從寬免死同妻子發往三姓地方若仍造言生事妄作妄言則是伊自殺其身也不可以彼地僻遠謂朕聞見不及也將此諭旨曉諭七十○癸巳予故廣東總督楊琳祭葬○甲午諭五旗王貝勒貝子公等凡王府等佐領下人有用於部院者有用於外省州縣者王等宜爲國家得人起見獎成循吏俾勤勞官職竭力自效王等亦與有光榮乃反令其酷害地方百姓侵尅錢糧妄取財物汝爲伊主顏面置於何地耶如王承勳一州縣官伊

主里尼一公爵耳尙勒取銀兩數千若屬於王府而爲大員者尙可問乎今將王承勳一事徧諭五旗王貝勒貝子公等嗣後儻仍不悛改再有發覺朕必將五旗王府佐領下人一概裁革永不敘用○衍聖公孔傳鐸奏闕里 聖廟被災情形得旨朕惟 孔子道高德厚萬世師表所以維世教立人極者與天地同其悠久朕臨御以來思極尊崇之典以申仰止之忱今闕里 聖像被災豈朕尊師重道之誠有未至歟朕在諒闇之中素服齋居毋庸更事減膳撤樂擬親詣國學文廟虔申祭奠宣讀告文以展朕跼蹐不安之誠先期齋戒二日於二十七日不設鹵簿朕素服前往諸王大臣官員陪祀者亦皆常服從事仍遣官馳赴闕里告祭以慰神靈幸新建崇聖祠無恙 聖像神牌不至露處朕心稍甯遣工部堂官一員會同該撫作速計材料工擇日興修務期規制復舊

廟貌重新告成之日朕將親詣行禮該部遵旨速行○戶部議覆戶部侍郎塞德奏請設立井田查內務府餘地一千六百餘頃入官地二千六百餘頃應於此內擇二百餘頃爲井田將八旗無產業人內自十六歲以上六十歲以下者派往耕種滿洲五十戶蒙古十戶漢軍四十戶共一百戶各受田百畝周圍八分爲私田中間百畝爲公田共力同養公田俟三年後所種公田之穀再行徵取於革職大員內揀選二人勸教管理三年分別議敘每年十月後農事既畢校圃學射並令戶部派員往視設立村莊蓋造土房四百間計口分給其耕種之人每名給銀五十兩以爲置辦種粒牛具農器之用其井田地畝儻有旗民交錯之地請將附近良田照數給換從之○丙申戶部等衙門議覆直隸巡撫李維鈞奏直隸正定府管轄三十二州縣鞭長不及請改設直隸州分轄南宮

新河棗強武邑衡水五縣分隸冀州柏鄉隆平高邑臨城甯晉五縣分隸趙州武強饒陽安平三縣分隸深州無極藁城二縣分隸晉州曲陽新樂二縣分隸定州直隸知州照知府之例稽察各縣錢糧案件其五州錢糧倉庫等項令直隸守道不時委員盤查從之○工部尙書李先復以老乞休允之○丁酉宗人府奏貝子允禔將 聖祖仁皇帝配享儀注及封 妃金冊遺漏舛錯應將允禔革去貝子降一等授爲鎮國公從之○戊戌 上以闕里大成殿災親詣國子監致祭 先師孔子○命都察院及八旗都統等申嚴官員等違越定制前施引馬及馬項懸纓等禁○己亥命禮部左侍郎王景曾往闕里告祭○封科爾沁固山額駙拉錫協理旗分事務一等台吉噶爾弼俱爲輔國公○庚子諭江西巡撫裴率度地丁錢糧百姓自行投納此定例也朕聞江西省用里民催

收每里十甲輪遞值年名曰里長催頭小民充者有經催之責既
不免奸胥之需索而經年奔走曠農失業擾民實甚須卽查明通
行裁革若慮裁革里長輪納不前亦當另設催徵之法或止令十
甲輪催花戶各自完納庶爲近便務須斟酌盡善無滋擾累以廣
朕惠愛元元之意○諭禁江西鄂教○以王景灝爲四川巡撫黃
焜爲陝西西安按察使由洮岷道遷○辛丑年夔堯奏據岳鍾琪報稱
進剿碁子山桌子山謝爾蘇屬下番賊殺傷賊目班第馬牙並賊
眾多餘皆敗奔山內隨派署總兵官宋可進統兵進剿番目嘎住
帶領男婦老小一千一百六十二口來投已准其投誠報聞